

18 JUL 1997

## PELABUR MASIH BIMBANG MENGENAI HALA TUJU SEGERA BSKL

Oleh: Azlina Aziz

KUALA LUMPUR, 18 Julai (Bernama) -- Rasa bimbang mengenai penyusutan berterusan nilai ringgit berserta dengan kebimbangan terhadap kenaikan kadar faedah mengakibatkan banyak pelabur kebingungan, tertanya-tanya apa yang akan dihadapi pula dalam minggu depan.

Seorang penganalisis berkata Bursa Saham Kuala Lumpur nampaknya terperangkap dalam arah menurun dengan para pelabur menunggu petunjuk baru untuk hala tuju segera.

Mereka berharap kepulangan Perdana Menteri Datuk Seri Dr Mahathir Mohamad daripada bercuti minggu depan mungkin akan menceriaikan pasaran dan mencetuskan minat membeli.

Sebuah firma peramal pasaran, Capital Dynamics Sdn Bhd, dalam kajiannya baru-baru ini telah menukar ramalan segera jangka pendek bagi Indeks Komposit kepada satu jajaran 970 hingga 1,150 dan ramalan untuk jangka pendek dan pertengahan kepada jajaran 970 hingga 1,280.

Bagaimanapun, ia masih mengekalkan sasaran jangka panjangnya pada paras 1,700 hingga 2,000.

Sejak beberapa minggu lalu, dagangan dalam bursa tempatan telah menurun tanpa sebarang lantunan bermakna dan hari ini, pengukur pasaran, Indeks Komposit mencecah 990.74 -- paras paling rendah setakat ini, setelah berlegar antara 1,000 - 1,100 sejak 13 Jun.

"Arah aliran semasa BSKL boleh dirumuskan sebagai "terumbang ambing" dengan keyakinan para pelabur masih tergugat dan diganggu oleh beberapa berita "kurang menyenangkan" kebelakangan ini," kata seorang peniaga.

Mula-mula sekali, langkah kembar Bank Negara untuk mengawal inflasi aset dan kemudian krisis baru-baru ini yang menjejaskan matawang serantau termasuk ringgit, yang telah dibelasah teruk oleh tekanan jualan yang memihak kepada dolar Amerika.

Penjualan spekulatif ringgit sejak Isnin, yang menekannya untuk turun ke paras rendah 2.6000/10 berbanding dolar hari ini, menimbulkan banyak ketakpastian, terutama sekali berkaitan kadar faedah yang melambung, pertukaran wang asing dan prospek segera pertumbuhan ekonomi.

Tidak lama lagi pengurus dana tentu akan membubarkan pegangan mereka dengan kadar faedah terus meningkat, apabila pelabur dana bersama menebus saham mereka untuk melabur dalam pelaburan yang lebih selamat.

Penganalisis itu berkata dana asing berkemungkinan akan terus berada di luar pasaran dan akan memberi tumpuan kepada pasaran yang berarah naik seperti Hong Kong dan London serta Wall Street.

"Jika keadaan menjadi lebih buruk, saya kira tumpuan mereka tidak lagi Asia Tenggara... mereka sedang menuju pasaran yang sedang berprestasi baik sekarang," tambahnya.

Penganalisis itu berkata dengan spekulator matawang menyelang-seli serangan mereka terhadap matawang Asean, banyak pelabur juga bimbang tentang kadar faedah semalaman yang mungkin menarik pelabur kepada instrumen pendapatan tetap dan tidak lagi melabur dalam pasaran ekuiti yang mudah meruap.

Ada yang berpendapat bahawa paras 900 adalah tahap sokongan yang kritikal yang mesti dipertahankan untuk membolehkan pasaran ini pulih, katanya. -- BERNAMA

AA SIA